

Regional News Unit AIR Aizawl
Thursday, September 26, 2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- AH & Vety Minister Pu C. Lalsawivungan sorkar laipuah ASF zangnadawmna chungchang leh he pul hri avanga State tawrhna a thlen.
- Rajya Sabha MP Pu K Vanlalvena'n Nikuma Mizoram puma a MPLAD fund thawk tura a thlan chhuah thenkhatte hnenah tun thlenga work order pek a la ni lo chu a ngaimawh tih a sawi.
- Nimina Jammu and Kashmir Assembly inthlan thawh hnihnaah vote zaa 54.11 a tla.
- External Affairs Minister Dr.S, Jaishankar chuan nizan khan New York-ah Russian Foreign Minister Sergey Lavrov a kawm.

<><><>

AH & VETY MINISTER

Sorkar laipui dawra Delhi a cham mek, AH & Vety Minister Pu C. Lalsawivunga chuan Union Minister for Fisheries, Animal Husbandry & Dairying Pu Rajiv Ranjan Singh hnenah ASF zangnadawmna chungchang leh he pul hri avanga State tawrhna a thlen

Pu C. Lalsawivunga chuan nikum 2023-24 chhunga MVU staff te hlawh tur central sorkar in zaa 25 chauh a pek avang leh, MVU staff ten October, 2023 thleng chauh hlawh an lak avanga an nawrhna , African Swine Fever (ASF) avanga State tawrhna leh ASF compensation chungchang te, Mizoram chu ruahtui tlak tamna a nih avanga Sawrkar laipuiin vaccine lak dan tur a ruahman anga a kal ve theih loh dan te a thlen a.

Union Minister Pu Rajiv Ranjan Singh chuan MVU hlawh chungchang chu revised proposal siam turin a chah a, kumin 2024-25 chhunga MVU staff te hlawh tur zaa 25 sanction nghal niin North East tana vaccination schedule hran siam dan tur ngaihtuah anih thu leh, ASF compensation chungchang pawh sawrkar laipuiin a ngaihtuah zel tur thu a sawi. Union Minister chuan check post tam zawk siamna turin NADCP scheme hmang tangkai turin a chah.

Ministry of Panchayati Raj changtu ni bawk Pu Ranjan Singh nen hian Local Administration Department mamawh te an sawi dun a, Mizoram LAD Minister hian VC-te enkawlina atana Central Scheme - Rasthya Gram Swaraaj Abhiyan chungchang thlenin, 2024-25 atana Central in budget a pawmsak cheng vbch 103.11 atanga 50% chu RGSA guidelines anga release sak thuai turin a ngen a, hei hi Union Minister chuan lo release sak thuai a tum thu a sawi bawk.

Minister Pu C.Lalsawivunga hian Union Minister for Minority Affairs, Pu Kiren Rijiju leh Minority Affairs Secretary Dr. Chandra Shekhar Kumar hmu in, Mizoram atanga PMJVK hnuai project submit te a sawipui a, Union Minister hian Mizoram atanga project submit te a ngaih pawimawh thu leh theih tawpa hma a lo lakpui zel tur thu a hrilh.



DISASTER

Indian Metereological Department Aizawl Center Director Sudheer Kumar Dwivedi-a chuan Mizoramin kumina ruahtui a dawng tam tih sawiin waviin hian a sur chhonzawm zel thei a ni a ti a, Kumin January thla atanga June thla thleng khan Mizoram pumah ruahtui milimeter 620 dawn a fla tawh a, a hun chhung inangah nikum khan ruahtui milimeter 600 vel a fla thung a ni.

Khawvel sik leh sa inthlak danglam nasa leh boruak lum chho zelah Mizoram pawhin kawng hrang hrangin a tuar chho ve a, global warming in a nghawng langsar zingah ruahsur dan hi a tel a, hmun hrang hranga ruahtui tlak dan a danglam nasa hle a, a thenah nasa taka a sur lain, thenkhatin ruahtui an hmu tlem em em thung a, a sur danah pawh hmun thenkhatah a sur miah loh lain hmundangah chuan a fla tam chi, leilung pawhin a tawrh phah theih hial khawp te in a sur thung a ni.



CM - WINERY

Chief Minister Pu Lalduhoma chuan Grape Growers Society te chu an Grape leh Wine deh chhuah hralhna kawngah sawrkarin thahnem a ngaihpui hle a ni tih hre turin a chah.

Nimina Champhai Grape Growers Society Winery, Tlangsam, a tlawh naah Society hotute nen inkawmin Chief Minister chuan an thilsiamte awmze nei leh hlawk zawka an hralh theih nan hma an la dawn a, grape chauh ni lovin thlai dang atanga siamchhuah thilte pawh an ngaihtuah tel dawn tih a hrilh a, hei bakah hian Mizoram sawrkar chuan flagship programme - ‘Bana kaih - Hand Holding Policy’ hmangin kuthnathawktute khai chhuah a tum mek a, he policy hnuai hamthatna te pawhin an mamawh dan a zirin an dil thei tih a hrilh bawk.

Champhai Grape Growers Society hotute hian Chief Minister hnenah hian Grape Wine an tharchhuahte hlawk zawk leh zau zawka an hralh chhuah theih nan sawrkar hmalakpuina an lo ngen a. Grape Wine chu food item a nih anga zalen taka hralh theih an duh thu leh License-Vendor system pawh mumal zawka kalpui an duh thu an lo hrilh a ni.

Inkawmna hi Champhai Grape Growers Society Chairman Pu HS Vanlalfakzualan a kaihruai a ni.



HEALTH MINISTER

Khawvel puma Pharmacist-te ni nimir khan Aizawlah Mizoram State Pharmacy Council hmalaknain Bawngkawn South YMA Hall ah hun hman a ni a. Health and Family Welfare Minister Pi Lalrinpuiin a hmanpui.

Pi Lalrinpuii chuan kalkhawmte hmaah hian Pharmacist-te pawimawhna leh mawhphurnate sawiin, Pharmacy chu eizawna leh mahni kea dinga sumdawna tha tak a nih thu bakah Pharmacist-te chu damdawi siamchhuah kawngahte, damlote tana damdawi nghawng hrang hrangte pawh thiamna bik nei leh zirchianga hrechiang bertu an nih avangin, khawtlang tana tangkai zawka hma la zel turin a fuih a. District Hospital tinah tal damdawi lama thiamna bik nei Pharmacist-te an awm a pawimawh thu a sawi a. Hei bakah hian Mizorama ruihhlo leh HIV hluar zel chungchang pawh Pharmacist-te chu thiamna bik nei an nih avangin tangkai lehzuala khawtlang, sawrkar leh midangte tana an thiamna bik hmang zel turin a chah baw a ni.

MSPC President Pu Lalsawma chuan fuihna thu sawiin, Pharmacist-te leh zirlaite chu midangte tana tangkai zawk leh dan ang taka damdawi mipuiin an hmuh theihna tura hmalakna kawngah theihtawp chhuah turin a chah nghal a. Dr. Lalnunpuii pawhin kalkhawmte hmaah kumin khawvel pum Pharmacist-te ni thupui, 'Pharmacists: Meeting Global Health Needs' (Khawvel mipuite hriselna atana Pharmacist-te pawimawhna) chungchang ngaihthlak a ni.

World Pharmacists Day hi kum 1992 atang khan International Federation of Pharmacists huaihawtin kum tinin hman a lo ni tawh thin a. He hun hmannaah hian Dept. of Pharmacy, RIPANS, Laithangpuii College of Pharmacy, Mizoram Institute of Pharmaceutical Science leh Mizoram Pharmacy Council hotute, member-te bakah sawm bik mi pawimawh thahnem tak an tel a ni.



RS MP

Rajya Sabha MP Pu K Vanlalvena'n Nikum October ni 6 a Mizoram puma a MPLAD fund thawk tura a thlan chhuahte chu a kalhmang tih danglam anih avangin pawhtlai a ni a, amaherawhchu an pawhtlai chhan pawh chinfel anih hnuah DC office thenkhat leh BDO office then khat ten tun thlenga MP LAD fund thawk tura Work Order an la pe chhuak thei lo chu a ngaimawh tih a sawi a, kum hlui 2023-2024 MP fund la thawh zawh loh hian kum thar MP fund 2024-2025 lo chhuak tur a dal tlat tih a sawi a ni.

Nimina Aizawl Press Club-a thuthar thehdarhtute a kawmnaah Pu K Vanlalvena chuan he thu hi sawiin, MP Fund chungchang hi sorkarah pawh a thlen tawh tih a sawi a, hma lak sak turin a duh a ti.

He hunah hian, MP Pu Vanlalvena chuan sorkar laipuiin kuhva chin a khap lo tih a sawi a, Mizorama kuhva chingtute leh chin zel tumtute tan mangan na tur a awm lo a ti.

Chief Minister Pu Lalduhoma'n tun hnaia Assembly session-a a thusawiah Sorkar laipuiin kuhva chin a khap tawh ni awma a sawi avangin Mizorama kuhva chingtute leh chin tuma hma la mektute manganna tawh thu Union Agriculture Minister Shivraj Kumar Chouhan a sawipui a, chutianga khapna thupek chu Central sorkarin a lo siam anih chuan an thupek sut leh turin a ngen nghal tih a sawi a, Union Minister chuan chutianga kuhva chin khapna thuchhuah chu Central sorkarin a chhuah loh thu leh chutiang thuthang chu thu dik lo a nih thu a hrilh thu a sawi a ni.

Rajya Sabha MP chuan Commissioner of Horticulture Prabhat Kumar pawhin Kuhva chin khapna thupek Central sorkarin engmah thuchhuah a neih loh thu a sawi thu tarlang bawkin, Mizorama kuhva chingtute leh chin zel tumtute tan manganna tur a awm lo tih a sawi bawk.



IIMC

Ministry of Information and Broadcasting hnuaiia zirna in Indian Institute of Mass Communication, Aizawl Regional Director thar turin Prof (Dr) Shashwati Goswami ruat a ni.

Regional Director thar ruatna lehkha hi nimin khan tihchhuah niin nimin vek khan Pi Shashwati Goswami hian a hna a zawm nghal a, IIMC Aizawl Campus Regional Director ni lai Prof (Dr) N. Sushil K. Singh chu a thlak a ni.

IIMC Aizawl Campus ah hian Mass Communication zirna Diploma Course in kum 1 chung buatsaih thin a ni a, tun dinhmunah zirlai 25 an awm mek a ni.



LUNGLEI SWACHHATA

Swachhata Hi Seva kalpui mekah nimin khan Urban Development & Poverty Alleviation (UD&PA) Department, Lungleia thawktute leh Mizoram Polytechnic Lungleia zirlaite leh zirtirtute chuan Hrangchalkawna Polytechnic junction kawngpui kam hnim leh bawlhhlawh then fai hnatlang an thawk.

Hrangchalkawn CTU hi Swachhata Hi Seva 2024 kalpui chhunga Lunglei khawpui huam chhung (urban area)-a vantlang hmunhma then fai ngai bik ruahman pariat zinga pakhat a ni a. Hnatlangah hian Mizoram Polytechnic Lungleia zirlai leh zirtirtu leh UD&PA Lungleia thawktute mi 300 chuang an thawk chhuak a. Kawng kam hnim an sam fai bakah, a paihna hmun ni lova bawlhhlawh paihte an thian fai a ni.

UD&PA-a thawktute chuan College Veng Branch YMA te nen Thuamluaia Mual CTU tihfai hnatlang an thawk tawh bawk a. Heti hian Swachhata Hi Seva 2024 kalpui chhung hian CTU ruahman pariat zinga panga - Zotlang CTU, Rahsi Veng CTU, Pukpui CTU, Thuamluaia Mual CTU leh Hrangchalkawn CTU-ah te faina hnatlang hi thawh tawh a ni.



SERCHHIP

Serchhip DC Pu Paul L Khuma chuan Kawlri Tlanga Heritage Site nimin khan a tlawh a.

DC hian hnathawh kal mek te a hmunah a a endik a. PWD hotute, Heritage Society aiawh te leh Contractor te nen a hmunah joint verification an nei a ni.

He project hi NEC fund atanga thawh niin ‘Establishing Mizo Cultural Heritage Centre for Protecting the historical and natural heritage of Mizo at Kawlri’ tih hming pu a project hi thawh a ni a. Kawlri tlang hi Mizo Lal Bengkhuaia kut ata saphoin Mary Winchester ‘Zoluti’ an laklet lehna hmun niin hriatrengna lungphun phun a lo ni tawh a. He hmun hi Mizo history a thil chhinchhiahtlak tak a nih avangin NEC hnuaiah project siamin Heritage Centre sak hna hi thawh a ni a. He Centre sak hna hi kumin May ni 1 atang khan bul tan a ni a. A hmunhma laih hna an thawk mek a, heritage centre sakna tur bungraw mamawh te lakkhawm mek a ni bawk.

He heritage site hi state pawn atang te leh Mizoram chhung hmun dang atanga khualzin te hip nan thil tangkai tak tur a ni a. Serchhip khawpui leh a chhehvel a cheng te tan pawh len khawthawna hmun remchang a ni a. A hmunhma hi a theih chin chinah environment humhalh zawnga hma lak a nih avangin a ngaw a la chhah tha a. Mizo history vawnhimna a nih bakah Serchhip District tan tourism hmasawna kawnga thil tangkai a nih theih beisei a ni.



J&K ELECTION

Nimina Jammu and Kashmir Assembly inthlan thawh hnihnaah vote zaa 54.11 a tla. Boruak ralmuang tak hnuaiah inthlan hi neih niin tharum thawhna leh pawikhawihna thleng hriat tur a awm lo niin Election Commission chuan a sawi a.

Inthlan thawh hnihnaah hian Assembly bial 26 ah vote thlak niin polling station sang thum leh 502 siam a ni a. Heng zingah hian khawpuiah polling station 1056 awmin thingtlangah 2446 siam a ni a. Inthlan buaipui tur hian mi sing 1 leh sang 3 chuang ruat an ni bawk. Inthlan thawh hnihnaah hian candidate 239 awmin voter nuai 25.78 an awm a ni.

Inthlan thawh hnihnaah hian venhimna pawh khauh taka kalpui a ni a. Polling station zawng zawngah hian webcasting khawl dah vek a ni bawk.

Puan tawh angin Jammu & Kashmir ah hian Assembly inthlan hi thawhthuma neih tur a ni a. Thawh khatna hi tun thla ni 18 khan neih a ni tawh a. Niminah thawh hnihna zawh fel a ni niin thawh thumnaah hian Assembly seat 40 ah October ni 1 ah vote thlak a ni leh ang. Vote tla te hi October ni 8 ah chhiar tura ruahman a ni.



EXTERNAL AFFAIRS MINISTER MET FOREIGN COUNTERPARTS

External Affairs Minister Dr.S, Jaishankar chuan nizan khan New York-ah Russian Foreign Minister Sergey Lavrov a kawm. UN General Assembly wawi 76-na hman mek karlakah Pu Jaishankara hian Russia hruaitu hi hmuin India leh Russia inkara thil pawimawh hrang hrang leh an chhehvel buaina chungchange a sawi pui a ni.

Dr. Jaishankara hian New Zealand Foreign Minister Winston Peters leh Belgium Prime Minister Alexander De Croo a kawm bawk a. Belgium Prime Minister nen hian thilsiamchhuahna manufacturing leh technology lama thawhdunna tur bakah Ukraine buaina chungchanga an ngaihda te an sawidun a. Greek Foreign Minister Giorgos Gerapetritis leh UK Foreign Secretary David Lammy te a kawm bawk a ni.

Pu Jaishankar hian UNGA hman mek karlakah hian a hmain Kazakhstan Foreign Minister Nurtleu, Morocco Foreign Minister Nasser Bourita leh Swiss Federal Councillor Ignazio Cassis te pawh a lo hmu tawh a ni.



PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 114-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

